

17. april 2015

UPA2015/7

Ilanngussaqq M



INATSIARTUT

**Ineqarnermut, Sanaartornermut
Attaveqarnermullu Naalakkersuisoq**

Ulloq: 13. april 2015

J.nr.: 01.31.11-00014

Aningaasaqarnermut Akileraartarnermullu Ataatsimiititaliamit sisamangornermi ulloq 16. april 2015, nal. 18.30 ataatsimiittarfik 1-imi siunersiorneqarnissamut aggeqqusissut.

2015-imi aningaasanut inatsisissatut siunnersuut pillugu Inatsisartut suleriaasianni § 19 naapertorlugu siunersiorneqarnissamut Ineqarnermut, Sanaartornermut Attaveqarnermullu Naalakkersuisoq Aningaasaqarnermut Akileraartarnermullu Ataatsimiititaliamit matumuuna aggersarneqarpoq. (UPA 2015/7).

Aningaasaqarnermut Ataatsimiititaliap oqaaseqaatai apeqqutaalu:

Aningaasaqarnermut Ataatsimiititaliap 2015-imi aningaasanut inatsisissatut siunnersuummut ilassutitut apeqqutai oqaaseqaataalu matumuuna nassiumneqarput. Ataatsimiititaliap 18. marts 2015-imi apeqqutaanut Naalakkersuisut akissutaasa Aningaasaqarnermut Ataatsimiititaliamit misissorneqarnerat apeqqutinut pingaarnertut tunngavigineqarpoq.

Tassunga atatillugu apeqqutit makku Naalakkersuisunit akineqarnissaat Aningaasaqarnermut Akileraartarnermullu Ataatsimiititaliamit kissaatigineqarpoq:

Immikkoortut normui taaneqartut ataatsimiititaliap 18. marts apeqqutaanut normuliunneqartut assigaat.

16.10 Konto pingarneq 87.11.09

Apeqqut 1: Apeqqut b-mut akissut)

Naalakkersuisut ima oqarnertik itisilissagaat ataatsimiititaliamit qinnutigineqarpoq: Assartuinermit Isumalioqatigiissitap ineriartorfusinnaasut mianersortumik nalilersoraluarai, kingornali paasinarsisoq tamanna naammassimangitsoq. Assartuinermit Isumalioqatigiissitap ineriartorfusinnaasutut tikkuagai Naalakkersuisut siunersiuinermi takussutissiussagai aammalu taakku pingasut ukiuni kingullerni tallimani nunatsinni aningaasaqarnerup ineriartornivianut sanilliutissagaat ataatsimiititaliamit qinnutigineqarpoq.

16.10 Konto pingarneq 87.11.09

Apeqqut 1: Apeqqut b-mut akissut)

Ataatsimiititaliap paasinninnera malillugu Newportimik suliniut aningaasaqarnikkut immikkut akilersinnaassappat Ilulissat atlantikoq qulaallugu mittarfutuatut inissisimasariaqassapput.

Taama naliliineq Naalakkersuisunit isumaqatigineqarsinnaava imaluunniit apeqqut taanna Naalakkersuisunit allatut isigineqarpa?


Nuummi atlantikoq qulaallugu mittarfiliorneq inuiaqatigiit aningaasaqarnerannit isigalugu pitsaanerpaamik aningaasaliinerussasoq Assartuineranut Isumalioqatigiissitap tikkuarppaa. Maannangaaq aammalu Newportimik suliniut eqqarsaatigalugu Assartuineranut Isumalioqatigiissitamit allaanerusumik isummernissamut Naalakkersuisut tunngavissaqarsoraat?

Naalakkersuisumik siunersiuinermini allanik aamma apeqquteqarnissani ataatsimiititaliap naatsorsuutigaa.

Ataatsimiititaliap Naalakkersuisumik siunersiuinerata Naalakkersuisup ataatsimiititaliallu akornanni pingaarnersiuilluni tullerriaarinerit anguniakkallu pillugit naalakkersuineranut tunngasumik oqaloqatigiinnertut sapinngisamik iluseqartinneqartarnissaa Aningaasaqarnermut Ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik siunersiuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik siunersiuinerata kinguninngua uunga nassiunneqarnissaa qinnutigineqarpoq: saam@ina.gl. Allakkiap ataatsimiititaliap Naalakkersuisumik siunersiuineranut nassarneqarpat atorneqarpallu taassuma nuutinera ataatsimiititaliap Naalakkersuisumik siunersiuinerata aallartinnerani ataatsimiititaliap oqalutnaanut ataatsimiititaliallu allattaanut tunniuteqquneqarpoq.

Inussiarnersumik inuullaqqusillunga



Jens Immanuelson
Ataatsimiititaliap siulittaasua



Inatsisartut Aningaasaqarnermut Akileraartarnermullu Ataatsimiititaliaat
/MAANI

**AIS-imi kontumut pingaarnermut 871109 – Assartuussineq pillugu
Isumalioqatigiissitaq – misissueqqaarneq, Aningaasaqarnermut Ataatsimiititaliaap
itisilliusussamik apeqquteqaataannut akissuteqaat**

16. april 2015
Sagsnr. 2015-113913
Dok. Nr. 1937223
Postboks 909
3900 Nuuk
Tlf: 34 50 00
Email: ISAN@nanoq.gl
www.nanoq.gl

Matumuuna apeqqutinut Aningaasaqarnermut Akileraartarnermullu Ataatsimiititaliaap
sisamanngorneq ulloq 16. april 2015 Isumasioqatigiinnermut atatillugu, kontumut
pingaarnermut 871109 – Assartuussineq pillugu Isumalioqatigiissitaq –
misissueqqaarneq, tunngatillugu apeqqutigisaannut allakkatigut akissuteqaat tulluuttuni
takuneqarsinnaavoq.

1. *Naalakkersuisut ima oqarnertik itisilissagaat ataatsimiititaliamit qinnutigineqarpoq:
Assartuinnermut Isumalioqatigiissitaq ineriartorfiusinnaasut mianersortumik
nalilersoraluarai, kingornali paasinarsisoq tamanna naammassimangitsaq.
Assartuinnermut Isumalioqatigiissitaq ineriartorfiusinnaasut tikkuagai
Naalakkersuisut siunersuinnermi takussutissiussagai aammalu taakku pingasut
ukiuni kingullerni tallimani nunatsinni aningaasaqarnerup ineriartornivianut
sanilluutissagaat ataatsimiititaliamit qinnutigineqarpoq?*

AKISSUT:

Assartuussineq pillugu Isumalioqatigiissitaq misissueqqissaarneri ukiut tallimat matuma
siorna suliarineqarput, aammalu ineriartorfiusinnaasutut ilusiliat suliarineqartut, Kalaallit
Nunaanni aamma nunani tamalaani ineriartornermut periarfissat qimerloorneqarneranni,
taamanikkut suut eqqorsorineqartut aallaavigalugit toqqarneqarput.

Aningaasaqarnermut Siunnersuisooqatigiit 2014-mut nalunaarusiaanni allassimavoq,
ukiut tallimat kingullit ingerlaneranni BNP-imi siuariartorneq 1 procenti inulaarlugu
annertussuseqarsimasoq.

Ukioq	2010	2011	2012	2013	2014	Gns
%- inngorlugu siuariarneq	2,5	4,0	-,09	-2,8	-1,9	0,9

Najoqqutarisaq: Aningaasaqarnermut Siunnersuisooqatigiit 2014-imut nalunaarusiaat, qupperneq 7.

Kisitsit taanna Assartuussineq pillugu Isumalioqatigiissitaq mianersornerpaamik
ineriartorfiusinnaasutut ilusiliaanit 1 procentip missaanik annikinneruvoq.

Kisiannili attaveqarnermi aningaasaliinerit ungasissorujussuarmut
aningaasaliinerusarnerat, taamaattumillu tamanna pillugu aalajangiinerni
ineriartornermut ungasissumut naatsorsuutigineqartut aallaavigineqartussaasartut,
isiginiassallugu pingaaruteqarpoq. 2010-imi Assartuussineq pillugu Isumalioqatigiissitaq
misissueqqissaarnerminik suliaqarmat, ineriartornermut mianersortorujussuarmik

missiliuineq 2 procentiussasoq naatsorsuutigineqarpoq, kisianni missiliuinerit taamaattut piffissap ingerlanerani allanngortarput.

Assartuussineq pillugu Isumalioqatigiissitap isumaliutissiissutaa attaveqarnermi suliassat ineriartortinneqarnerisa pingaarnersiorneqarnerannut sakkussaasimavoq pingaaruteqartoq – aammalu suli taamaalluni –, kisianni Isumalioqatigiissitap inassuteqaatai sutigulluunniit kisimiitinneqarsinnaanngillat. Taamaalilluni attaveqarnermut suliassanut anginerusunut tamaginnut inuigaqatigiit aningaasaqarnerannut sunniutaasussanik nalilersuineq sularineqartarpoq, taamatullu ingerlatsinermut sunniutaasussat misissoqqissaarneqartarlutik. Misissueqqissaarnerit taakkua soorunami ineriartorfiusussanut maannakkut naatsorsuutigisaqarnerit atorlugit soorunami sularineqartarput. Assersuutigalugu inuiaqatigiit aningaasaqarnerannut sunniutaasussanik nalilersuineri Qaqortumi mittarfissamut tunngatillugu 2014-imi ukiaanerani sularineqartumi, BNP-imi 1,5 procentimik siuariarnissaq atornerarpoq. Kisitsit taanna Aningaasaqarnermut Siunnersuisooqatigiinnit nalunaarusiami 2013-imeersumi inassutigineqarpoq.

2. Ataatsimiititaliap paasinninnera malillugu Newportimik suliniut aningaasaqarnikkut immikkut akilersinnaassappat Ilulissat atlantikoq qulaallugu mittarfitaatut inissisimasariaqassapput.

Taama naliliineq Naalackersuisunit isumagineqarsinnaava imaluunniit apeqqut taanna Naalackersuisunit allatut isigineqarpa?

AKISSUT: Naalackersuisut naliliipput nunatsinni attaveqarnerup ineriartortinneqarnerata ataqatigiissumik isigineqarnissaa pisariaqartinneqartoq. Tamanna soorunami aamma mittarfinnut atuuppoq. Tamatuma kingunerisaanik mittarfiup ataasiinnaap pitsaangorsarneqaannarnissaa ajornarpoq, tassami tamanna sumiiffinni allani pitsaanerulersitsinginnermik malitseqarsinnaammat. Mittarfinnut tunngatillugu ineriartortitsinissamut ataatsimoortut pingasut 2015-imi Inatsisartut ukiaanerani ataatsimiinneranni saqqummiutissallugit Naalackersuisut naatsorsuutigaat: ataaseq Tunumut tunngatillugu Ittoqqortoormiini aamma Tasilami mittarfinnut tunngassuteqartoq, ataaseq, Nuup kujataani attaveqarnermut tunngassuteqartoq, aammalu ataaseq Nuummumut aamma Ilulissanut tunngassuteqartoq. Kingulliullugu taaneqartoq ataqatigiissutut isigineqassaaq, taamatullu Kangerlussuarmi mittarfiup matuneqarnissaa pillugu pilersaaruteqartoqanngilaq, naak immaqa ilaasunik assartuussinermut tunngatillugu siunissami nunatsinni mittarfittut pingaarnertut atorunnaarneqartussaagaluartoq.

Mittarfinnut tunngatillugu ataatsimoortut pingasut taakkua pillugit Inatsisartut Aningaasaqarnermut Akileraartarnermullu Ataatsimiititaliaat Sanaartornermut Ataatsimiititaliaq peqatigalugu ulloq 24. april ataatsimiinnissamut qaaqquneqarpoq, aammalu tassani ineriartortitsinissamut Naalackersuisut pilersaarutaannut tunngatillugu annertunerusumik itisiliissaanga.

3. Nuummi atlantikoq qulaallugu mittarfiliorneq inuiaqatigiit aningaasaqarnerannit isigalugu pitsaanerpaamik aningaasaliinerussasoq Assartuinerimut Isumalioqatigiissitap tikkuarppaa. Maannangaaq aammalu Newportimik suliniut eqqarsaatigalugu Assartuinerimut Isumalioqatigiissitamit allaanerusumik isummernissamut Naalackersuisut tunngavissaqarsoraat?

AKISSUT: Nuummi mittarfiup ineriartortinneqarnissaa inuiaqatigiinnut iluaqutaassasoq Assartuussineq pillugu Isumalioqatigiissitap naliliinerat Naalackersuisut isumaqatigaat.

Taamaattumik matuma siuliani taaneqartutut ataatsimoortunik, Nuummi aamma
Ilulissani mittarfiit ineriartortinneqarnissaannut tunngasunik Naalakkersuisut suliaqarput.

Inussiarnersumik inuulluaqqusillunga



Knud Kristiansen



Qaasuitsup Kommunia
Postbox 1023
3952 Ilulissat
qaasuitsup@qaasuitsup.gl
Att. Borgmester Ole Dorph

Projekt Newport pillugu

Asasara Ole Dorph.

Naalakkersuisut 18. februar 2015-imi ataatsiminnerminni Kalaallit Nunaanni mittarfinnik sanaartornissamut alliliinissamullu suliaasanut pilersaarut akueraat. Nunatsinni silaannakkut angallassinermi attaveqaatit pioreersut tamakkiisumik angallaneqarnissamut pisariaqartitsinermut naammassinniffiunngitsut pillugu nassueruteqarneq tamatumunnga tunngaviuvoq. Innuttaasut amerianersaasa ornitaminnut toqqaannartumik timmisartorsinnaannginnerat, akuttunngitsumillu ataasiarlutik arlaleriarlutilluunniit akunnittariaqartarnerat, tamatumani nunap iluani imaluunniit Kalaallit Nunaannut aamma Kalaallit Nunaanniit angalaneq apeqqutaatinnagu. Taamatuttaaq maanna ilusiligaanerat takornariaqarnerup inuussutisarsiuutit, aningaasat nalinginik isaatitsivittut annertuutut pitsaasumik ineriartornissanut tapersiinnaanngilaq.

Mittarfinnik ataqatigiinnik, ingerlatsinikkut sullissinikkullu imminnut tapersersoqatigiillutik ataqatigiissunik pilersitsinissaq Naalakkersuisut pingaartippaat. Taamaattumik aallaqqaammut mittarfiit tallimat sananeqarnissaat allilernerqarnissaallu aallunneqassasoq Naalakkersuisut aalajangiipput. Tassani suliaasat ataatsimoortut aalajangersimasumik suliarineqassapput: Ataaseq Tunumi, Ittoqqortoormiit aamma Tasiilap mittarfiinut tunngasoq, ataaseq Nuup kujataani attaveqaatinut tunngasoq aammalu ataaseq Nuummur Ilulissanullu tunngasoq. Aningaasaqarneq inuiaqatigiillu eqqarsaatigalugit mittarfiit taakku slunnersuutigineqarput, aammalu Naalakkersuisut mittarfinnut aningaasaliinissamut suliniutaanni qitiutinneqassallutik.

Ilulissani aamma Nuummi mittarfiit ineriartortinneqarnissaat imminnut qanittutut Naalakkersuisunit isigineqarput, mittarfinni marluusuni taakkunani sullissinernik atortunilu assigiinnik atuisoqarsinnaasariaqarmat, taamaallutillu mittarfiit imminnut tapersersoqatigiissinnaasariaqarmata. Ullumikkut Kangerlussuarmut ilaasartut 40%-iisa missaat Nuummukartuusarput, Nuummilu mittarfiup allilernerqarnerani tassunga ilaasartorpassuit timmisartuunneqartarnerat pitsanngorsarneqartussaavoq. Taamatuttaaq Nuuk aqquusaarlugu Kalaallit Nunaata kujataanut ilaasartut sivikinnerusumik angalasalissapput, maanna Kangerlussuaq aqquusaarlugu angalasarnermut naleqqiullugu. Ilulissani takornariartitsiviusinnaasut, mittarfimmik timmisartunik annerusunik sullissinnaasunik pisariaqartitsiviusut atorneqanngitsut annertupput. Taamatuttaaq Kalaallit Nunaata avannaanut angalasut tassanngaanniit pissusissamisuuginnartumik aallaaveqarsinnaapput.

Tunngavilersuut kingulliullugu taaneqartoq aamma Ilulissani Projekt Newport-ip mittarfinnut tunngasortaani saqqummiunneqarpoq. Qaasuitsup Kommuniata sumiiffimmi ineriartortitsinissaq anguniarlugu mittarfinnik ineriartortitsinissamik kissaatteqarnera

14. april 2015
Sagsnr. 2015-113918
Dok. Nr. 1933684
Postboks 909
3900 Nuuk

TF: 34 50 00
Email: fsan@nanoq.gl
www.nanoq.gl

paasilluarsinnaavara. Kisiannili nunatsinni attaveqaatit nunap immikkoortuini taamatullu nuna tamakkerlugu ataqatigiissumik ineriartortinneqarnissaat Naalakkersuisut klossaatigisorujussuuat. Tassalu sullassani ataasiakkaani sanaartorneq aningaasaliisernerlu imminnut atasutut isigineqassapput, aammalu annikitsukkaarlugit pitsanngorsaanissaq pilersinniarnagu Naalakkersuisut isumaqarput, mittarfinnik attaveqaatinillu allanik ineriartortitsineq nuna tamakkerlugu ingerlanneqartariaqartoq.

Qaasuitsup Kommuniata Projekt Newport aallartissimmamagu paasilluortorujussuuara, tassami ukiorpassuarni kingullerni Namminersorlutik oqartussat tungaaniit sullassaqarfimmi tassani aalajangersimasunik ineriartortitsinissamut suliniuteqartoqarsimangilaq. Kisiannili isumaqarluinnarpunga, attaveqaatinut suliniutit taamatut annertutigisut pingaaruteqartigisullu Namminersorlutik Oqartussaniittariaqartut, taamaattumillu Projekt Newport maannatut iluseqartillugu Naalakkersuisut tapersorsinnaangilaat.

Imaanngilaq Ilulissani ineriartorneq unissasoq. Taamaanngilluinnarpoq. Kisiannili sullassat ingerlanissaanut pilersaarut, Naalakkersuisunit februaarip ulluisa 18-anni akuerineqartoq aqutugalugu, 2015-imi ukiakkut ataatsimiinnermi Nuummi Ilulissanilu mittarfiit pillugit aalajangiiffigisassanik ataatsimoortunik saqqummiussisoqarnissaa isumaqatigiissutigineqarpoq.

Suliap siumut ingerlanissaa qulakkeerniarlugu apriliip ulluisa 17-anni mittarfinnik ineriartortitsineq pillugu Naalakkersuisut isumasioqatigiissitsiniarput, aammalu apriliip ulluisa 24-anni Inatsiartut Sanaartornermut Ataatsimiittitaliaat aamma Aningaasaqarnermut Akileraartarnermullu Ataatsimiittitaliaat ataatsimeeqatiginiarlugit qaaquakka, tassanilu mittarfiit pillugit pilersaarutit oqaluuserineqassapput.

Taamak annertutigisumut aalajangiinissaq sioqqullugu misissueqqissaarnernik amerlasuunik ingerlatsisoqartussaavoq, taamaalilluni aalajangiinissaq eqqortunik tunngaveqarluni pisinnaammat. Projekt Newport-imut atatillugu kommunip tungaaniit sulilluortoqangaatsiarsimavoq, suliallu taakku inerneru suliap ingerlaqqinnissaanut ilaatikkusuttorujussuuagut. Taamatuttaaq nutaamik mittarfittaarnissaq pillugu kommunip aamma Namminersorlutik Oqartussat akornanni ingerlalluurtumik suleqatigittoqarnissaa pingaaruteqartorujussuuvoq. Maannamut suleqatigiilluarsimavugut, neriutigeqaaralu taanna ingerlaqqikkumaartoq.

Aningaasaqarnermut tunngasortai eqqarsaatigalugit Naalakkersuisut naliliipput, mittarfinnut attaveqaatit annertuumik pingaaruteqarmata suliaq Namminersorlutik Oqartussaniittariaqartoq. Taamaattumik maannarpiaq aningaasaliinissamut pilersaarut, Namminersorlutik Oqartussat mittarfinnik piginnittuunissaannut qulakkeeriffiusoq suliarineqarpoq. Tassani Ilulissani mittarfik taamatullu mittarfiit pilersaarusiortigineqartut sinneri pineqarput. Taamaalilluni pigisat nalilit, niuerfiit nutaat tunngavigalugit nunatsinni pissarsiarineqartut aamma nunatsinni innuttaaqatitsinnut iluaqutaanissaat pitsaanerpaamik qulakkeerneqassaaq.

Naggasiutigalugu oqaatigissavara, mittarfinnut pilersaarutip saniatigut pissutsit allat, Projekt Newport-imut ilaatinneqartut Naalakkersuisunit isiginiarneqarmata. Tassani inuussutissarsiornermi suliniutissat, takornarianut pilersaarineriut pisariaqartut isiginiarneqarput, tassami mittarfik kisimi ineriartortitsinermik pilersitsinnaangilaq. Kiisalu umiarsualivinnut pilersaarummi, tusarniaassutigalugu nassiunneqaqqammersumi allassimavoq, Ilulissani umiarsualivik umiarsualivinnut, ineriartortitsinissaq eqqarsaatigalugu sallersaasussanut ilaatinneqartoq.

Neriuppunga, matuma siuliani allassimasut tunngavigalugit Qaasuitsup Kommuniata

suliniutaanut Projekt Newport-imut tunngatillugu Namminersorlutik Oqartussat
inissisimaffiat ersarinnerulersissimassallugu. Aamma neriuppunga, siunissami Ilulissani
kommunillu sinnerani attaveqaatinik ineriartortitsineq pillugu suleqatigiilluarneput
ingerlaqqikkumaartog.

Inussiarnersumik inuulluaqqusillunga



Knud Kristiansen